

## Omaggio alla Pizza

di Adolfo Giuliani



A Capodimonte il forno della prima pizza

**8 dicembre, “L’ARTE  
TRADIZIONALE DEI PIZZAIUOLI  
NAPOLETANI” È PATRIMONIO  
CULTURALE IMMATERIALE  
DELL’UMANITÀ.**

## 'A pizza

l' so' 'a pizza,  
ccà, a casa mia,  
a Napule,  
me cunuscite tutti quanti,  
e me canosce pure  
tutt' 'o munno  
e pure fora d' 'o munno,  
pecché m'hanno purtato pure int' 'o spazio!  
Mo tengo 'o riconoscimento  
d' 'a giuria e l'Unesco,  
pe' comme songo stata brava!  
'Nu riconoscimento importante  
pe' chi, comme a mme, ha faticato tanto!  
'E genitore mieje  
se chiammano "Vesuvio"  
e "Partenope".  
Ponno essere cuntente:  
loro so' state assaje importante  
pe' me.  
Mo aggio saputo  
ca tutte 'e pparte d' 'a terra  
me vonno bene  
e ca 'o premio è stato giusto e meritato  
pe' tutto chello c'aggio fatto  
da che so' nata,

pe' chesto ve voglio ringrazià  
a tutte quante,  
ma aggi' 'a ringrazià pe' primma cosa  
e genitore mieie  
e tutte 'e frate e sore  
ca m'hanno aiutato a crescere.  
Quanno so' nata nun 'a canoscevo 'a pummarola,  
po' c' 'o tempo me l'hanno presentata  
e accussì è accumminciata 'na bella amicizia,  
mettenno 'nzieme, 'a pummarola, l'uoglio, l'aglio  
e 'o ppoco d'aregeta,  
me chiamavano marenara.  
Po', doppo tantu tempo,  
avimmo fatto pure  
sulo pummarola, muzzarella, uoglio e vasinicola  
e me chiamavano margherita.  
Chianu chianu 'o guardarobba è crisciuto  
'e vestite so' state tante,  
'e tante manere,  
ma sempe sapurite.  
'E mieje m'hanno crisciute  
cu 'e mullechelle,  
nun m'hanno fatto mancà maje niente  
e m'hanno fatto pure viaggià tanto,  
facennome canoscere 'o munno intero.  
'A famiglia mia  
m'ha aiutata a essere sempe cchiù bella  
e 'o vvoglio dicere,  
i', senza lloro, addó ievo?  
A me me piace 'e viaggià  
i' vaco sempe 'a tutte parte  
e addu tutte chille  
ca me vonno bene,  
pirciò i' vengo pure addu vuie,  
quanno me vulite,  
ma po' torno sempe 'n'ata vota 'a casa mia  
pecché i', luntana 'a Napule,  
nun pozzo stà.